

■ PLED SIN VIA

In taschair spontan

DA GISULA TSCHARNER, VEULDEN

Empè da raquintar ni explitgar in'istorgia da la Bibla, rapport jau oz insatge da quellas personas ch'han da raquintar ed explitgar ord professiun istorgias da la Bibla, e quai èn ils preditgants e las preditgantas. Cun quattordesch d'els e d'ellas fatsch jau durant quest'emna in curs da scolaziun en l'institut s. Josef qua a Glion. Quai ch'è vegnì emprendì en quests dis è il predi libra, senza manuscript u chavazzins. Il predi liber, preparà exactamain e conscienziusamain en l'olma ed en il tscharvè, è ina buna mixtura dal «viver or dal venter» e dal «far urden en il tscharvè». Spiritualas e spirituals da tut la Svizra fan cun mai exercizis enavant ed enavos, mintgina e mintgin ha da tegnair almain in predi al di.

Quants predis che quai dat cun 14 participantas e participants... Ed il pli sorprendent è: Jau na sun anc betg unfisa da tadlar quests blers predis! Quests curts messadis da trais enfin set minutas han ina forza enorme e multifara. Pertgè? Perquai ch'ils preditgants èn sfurzads da sa concentrar al pli essenzial, quai vul dir cun al meglier da tut ses patratgs preparads. Flosclas e lapalias, exempels mo mez-buns sco era patratgs memma cumplitgads crodan, crodan en il dretg senn dal pled ord la memoria. Bun!

Scrivend ora in predi, san ins metter sin il palpiri tut, propi tut: Las teorias pli cumplitgadas e lungurusas, chaussas ch'ins schess tut auter, direct davant ils auditurs en il banc-baselgia. Las paginas smatgadas ora dal stampader dal pc fan

ina tscherta impressiun, ma: Igl è in pled scrit e betg in pled discurrei. Jau persunalmain discurrei gugent tar la gliued, las guardond en fatscha fashand las frastas directamain en il contact cun il visavi. Sco en la vita «normala», vid la maisa, sin via en il vitg, en l'ustaria, en il «tête-à-tête» cun in auter carstgaun.

Co pia tegnair tut il predi en il chau? Quai na basegna, en ils detagls! En cuntrari a las frastas scrittas/stampadas che han tuttas la medema paisa e valitta, nair sin alv, san las frastas dal predi liber vegnir formuladas en il mument; jau sai las scursanir u bajegiar ora, las repeter, las moderar. Sch'ins ha en il tscharvè il fil cotschen e l'andament da quest fil, lura san ins sa concentrar als puncts propi essenzials a l'exempel che va gist ussa a pèr, al messadi biblic che pertutga mai, la predicatura, e Vus che avais il dretg ed il giavisch da survegnir in impuls per la vita. Nutriment spiritual en x-ina maniera. Nagin manuscript è tranter predicatur ni predicatura ed auditurs en ils bancs, nagina barriera. Il predi sa fluir directamain da fatscha en fatscha, dad olma ad olma (cun las alas dal Spiert sontg, speranza!).

La fin d'in da quests predis curts m'è stada endament da guisa particulara ed impressiunanta: La preditganta ha ditg: «In ferm pled, quest pled da Dieu, el ma fa bunamain perder il linguatg; pli gugent tasch jau in mument cun vus ensemen.» Quai avain nus era fatg. A mai parevi che gist quest taschair spontan m'haja gidà da prender si profundamain il messadi biblic cun il cuntegn dal predi.